

ՀԱՅԿԱԿԱՆ ԿՈՆՅԱԿԻ ՈՒ ԲՐԵՆԴԻԻ ԳԻՆԵՆՅՈՒԹԻ, ՍՊԻՐՏԱՀՈՒՄՔԻ,  
ՍՊԻՐՏԱՋՐԻ, ԲՈՒՐԱՎԵՏ ՋՐԻ ԵՎ ԽԱՂՈՂԻ ՕՂՈՒ ԳԻՆԵՆՅՈՒԹԻ ՈՒ  
ԹՈՐՎԱԾՔԱՀՈՒՄՔԻ ԹՈՐՄԱՆ ՀԱՄԱՐ ՆԱԽԱՏԵՍՎԱԾ ՍԱՐՔԵՐԻՆ  
ՆԵՐԿԱՅԱՑՎՈՂ ՏԵԽՆԻԿԱԿԱՆ ՊԱՀԱՆՋՆԵՐԸ

### I. ԿԻՐԱՌՄԱՆ ՈԼՈՐՏԸ

1. Սույն պահանջներով սահմանվում են հայկական կոնյակի ու բրենդիի գինե-  
նյութի, սպիրտահումքի, սպիրտաջրի, բուրավետ ջրի և խաղողի օղու գինենյութի ու թոր-  
վածքահումքի թորման համար նախատեսված սարքերին ներկայացվող տեխնիկական  
պահանջները:

### II. ԸՆԴՀԱՆՈՒՐ ԴՐՈՒՅԹՆԵՐ

2. Հայկական կոնյակն ու բրենդիի գինենյութը, սպիրտահումքը, սպիրտաջուրը,  
բուրավետ ջուրը և խաղողի օղու գինենյութն ու թորվածքահումքը թորվում են այդ նպա-  
տակով նախատեսված պարբերական կամ անընդհատ գործողության թորման սարքե-  
րով՝ Հայաստանի Հանրապետության կառավարության 2009 թվականի հունիսի 18-ի N 678-Ն  
որոշմամբ սահմանված ժամկետներում և կարգով:

III. ՀԱՅԿԱԿԱՆ ԿՈՆՅԱԿԻ ՈՒ ԲՐԵՆԴԻԻ ԳԻՆԵՆՅՈՒԹԻ, ՍՊԻՐՏԱՀՈՒՄՔԻ,  
ՍՊԻՐՏԱՋՐԻ, ԲՈՒՐԱՎԵՏ ՋՐԻ ԵՎ ԽԱՂՈՂԻ ՕՂՈՒ ԳԻՆԵՆՅՈՒԹԻ ՈՒ  
ԹՈՐՎԱԾՔԱՀՈՒՄՔԻ ԹՈՐՄԱՆ ՀԱՄԱՐ ՆԱԽԱՏԵՍՎԱԾ ՍԱՐՔԵՐԻՆ  
ՆԵՐԿԱՅԱՑՎՈՂ ՏԵԽՆԻԿԱԿԱՆ ՊԱՀԱՆՋՆԵՐԸ

3. Պարբերական գործողության «Շարանտական» տեսակի թորման սարքը պարու-  
նակում է հետևյալ պարտադիր բաղկացուցիչ մասերը՝ թորման կաթսա, դեֆլեգմատոր,

սառնարան, ինչպես նաև թորման կաթսան, դեֆլեզմատորն ու սառնարանն իրար միացնող խողովակներ:

4. Միապատիկ գործողության «Զոհրաբյան» տեսակի թորման սարքը պարունակում է հետևյալ պարտադիր բաղկացուցիչ մասերը՝ թորման կաթսա, հարստացնող աշտարակ, դեֆլեզմատոր, սառնարան, ինչպես նաև թորման կաթսան, դեֆլեզմատորն ու սառնարանն իրար միացնող, սարքի սպասարկման ու թորման գործընթացն ապահովող խողովակներ: Հարստացնող աշտարակը պարունակում է հարստացնող ափսեներ:

5. Պարբերական գործողության «Շարանտական» տեսակի առաջին փուլով թորման համար նախատեսված սարքի թորման կաթսայի առավելագույն ծավալը կազմում է 1100, իսկ երկրորդ փուլով թորման համար նախատեսված սարքի թորման կաթսայի առավելագույն ծավալը՝ 500 դեկալիտր:

6. Միապատիկ գործողության «Զոհրաբյան» տեսակի թորման սարքի թորման կաթսայի առավելագույն ծավալը կազմում է 600, իսկ թորվող հումքի առավելագույն քանակությունն այդ կաթսայում՝ 500 դեկալիտր:

7. Միապատիկ գործողության «Զոհրաբյան» տեսակի թորման սարքի հարստացնող աշտարակի ափսեների թիվը չի գերազանցում հինգը:

8. Անընդհատ գործողության թորման սարքը պարունակում է հետևյալ պարտադիր բաղկացուցիչ մասերը՝ աղքատացնող և հարստացնող մասերից բաղկացած թորման աշտարակ, հումքի նախնական դեֆլեզմատոր-տաքացուցիչ-խտացուցիչ (կոնդենսատոր), գազանջատիչ (սեպարատոր), խտացուցիչ, սպիրտային գոլորշիների որսիչ, սառնարան, ինչպես նաև այդ մասերն իրար միացնող, թորման գործընթացն ու սարքի սպասարկումն ապահովող խողովակներ: Աղքատացնող և հարստացնող աշտարակները պարունակում են աղքատացնող և հարստացնող ափսեներ:

9. Անընդհատ գործողության թորման սարքի դեֆլեզմատորը, աղքատացնող և հարստացնող աշտարակները սնամեջ տարաներ և (կամ) գլաններ են, որոնք նախա-

տեսված են թորվող հումքի գոլորշիների մասնակի խտացման (ֆլեգմայի առաջացման), առաջացած ֆլեգման թորման կաթսա և (կամ) ափսեներ մասնակիորեն վերադարձնելու համար:

10. Անընդհատ գործողության թորման սարքի ափսեն պղնձյա և (կամ) իներտ նյութից պատրաստված միջնապատ է: Այն նախատեսված է թորվող հումքի և դրա գոլորշիների՝ իրար նկատմամբ հանդիպակաց շարժումն ապահովելու համար: Ափսեն լինում է միջանցիկ անցքերով և պարունակում է փոխյցնող խողովակներ:

11. Անընդհատ գործողության թորման սարքի ափսեի վրայի կտրվածքների մակերևույթների գումարը կազմում է աշտարակի հորիզոնական կտրվածքի մակերեսի 10-15 տոկոսը:

12. Անընդհատ գործողության թորման սարքի աղքատացնող աշտարակի ափսեների թիվը չպետք է պակաս լինի 16-ից, իսկ հարստացնող աշտարակի ափսեների թիվը չպետք է գերազանցի 7-ը:

13. Պարբերական գործողության թորման սարքերի թորման կաթսան, դեֆլեգմատորը, հարստացնող աշտարակը, դրանց ափսեները և թորման կաթսան, դեֆլեգմատորը, հարստացնող աշտարակն ու սառնարանն իրար միացնող խողովակները, իսկ անընդհատ գործողության թորման սարքերի դեֆլեգմատորն ու սառնարանի օձագալարը պետք է պատրաստված լինեն պղնձից:

14. Թորման սարքերի բոլոր այն բաղկացուցիչ մասերը, որոնք անմիջականորեն շփման մեջ են գտնվում թորվածքի գոլորշիների և (կամ) թորվածքների հետ, պետք է պատրաստված լինեն միայն սննդային պղնձից, որում պղնձի պարունակությունը պետք է կազմի նվազագույնը 99,5 տոկոս:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ-ՆԱԽԱՐԱՐ

Դ. ՀԱՐՈՒԹՅՈՒՆՅԱՆ